

Reaccion
**Mayornan tiki
disgusta cu
mama di Natalee
a bay school**

ORANJESTAD (AAN): Ta parce cu mayornan no a keda nada contento, cu e mama di e estudiante desapareci Natalee, a bishita algun school basico na Aruba sin previo aviso.

Normalmente ora school tin actividad planea pa muchanan, semper tin di manda pidi permiso di e mayornan pa haci tal.

Sinembargo, loke a socede Diahuebs mainta a socede sin e permiso ey.

Algun hende a considera loke a socede na school, como un "circo pa TV". Con por yega cerca e muchanan aki den klas cu no ta papia ingles, cu e pregunta si nan "conoce Natalee?"

Pasobra si bo puntra muchanan mes di school si acaso nan sa kende ta nos mama di cultura, Bernadina Grovell, tin chance cu nan ta sacudi nan cabez tambe.

E pregunta di algun mayor, ta kico e Mama aki a bay haci school? E no tabata un bishita educativo at all. Fuera di esey, muchanan a relata na cas cu e Mama di Natalee tabata hari so.

Nan ta bisa, cu lo peor ta cu Departamento di Turismo di Aruba ta presta su mes na e tipo di cosnan aki.

Mayornan no tabata sa mes cu nan yiunan na school a worde sometí na entrevista. Kizas nan no a duna permiso mes.